

# 《金剛般若波羅蜜經導讀》 補充講表

◎附表十七：以下糅合《金剛經講義》

○「須菩提！於意云何？如來有所說法不？」須菩提白佛言：「世尊！如來無所說。」

※《彌陀要解》云：「覓之了不可得，而不可言其無；具造百界千如，而不可言其有。」

※《金剛經破空論》云：「此即彼義無上也，以般若波羅蜜中，文字性離；不可以文字而

說取故，故云：四十九年不說一字，所謂終日說而無說，非以

默然為不說也。若不了無上義，即彼默然，亦意言故。」

※《大乘起信論》云：「當知染法淨法，皆悉相待，無有自相可說。是故一切法，從本以

來，非色非心，非智非識，非有非無，畢竟不可說相。而有言說

者，當知如來善巧方便，假以言說，引導眾生。其旨趣者，皆為

離念，歸於真如。以念一切法，令心生滅，不入實智故。」

◆以一切法緣生幻有，本無自相，豈有自相可說！安可執著名字相！故曰：「般若即非般若」。且佛證真如實智故，雖熾然而說，實無言說之相。故曰：「如來無所說」。但為眾生故，假以言說引導，令其離念證性。由是可知經中曰般若非般若，令離名字相；又曰無所說，令離言說相者，其宗旨非為欲令大眾離念歸於真如乎！然則所謂奉持者，謂當奉持金剛斷除妄念，亦可知矣。

◆又此兩科，是明空如來藏也。空有二義：（一）性體本空。（二）空其妄念。

此中曰般若即非般若，曰如來無所說，說性體本空也；

而離名字相，離言說相者，空其妄念也。

◆因是知得性本無念，及念亦本空。為欲除其妄念，故起觀照之用。此用乃順性體而起，故與昧性而起者，大異其趣。此之謂隨順，此之謂方便。然應知起此觀照之念，亦復是幻，亦是緣生無性，今不過借以除他念耳。若執此念為真，便又成病。

◆約觀照言，若心中存有能觀照、所觀照之念，亦未離名字相。乃至證得實相般若，實亦無所證，無所得。若有證有得，仍然未離名字相，即非實相，亦不名般若波羅蜜矣。

◆凡一切法，皆有差別之相。就其差別，安立名字，故名字之言，是就相說。相是幻有，則名為假名。幻有者，明其非有而有，有即非有之意。不壞者，不斷滅意。相是體起之用，何可斷滅？雖不斷滅，然而相實非體，故仍不應取著。因體是不變，相常變動。體是本，相是末。不應捨本逐末，迷相忘體，故不應著也。

○「須菩提！於意云何？三千大千世界，所有微塵，是為多不？」須菩提言：「甚多，世尊！」

◆此問亦躡上文來。蓋著相者聞無所說，將曰若無所說，何以教化三千大千？且言說本來無相，縱可云說無所說，而世界之大其相宛在，豈得曰世界無世界乎？為遮此疑，故發此問。

◆問語甚妙，不問世界，而問所有微塵多否。意明世界是由眾多微塵集合，而現三千大千

之幻相耳。

◆長老深領佛旨，故答甚多。意明世界所有，無非眾多微塵耳。然則除多數微塵外，豈別有一世界哉！會得但是塵多，便知大千世界，有即非有。

○須菩提！諸微塵，如來說非微塵，是名微塵。如來說世界，非世界，是名世界。

◆約性而說，本非實體，故曰非也；不無幻相，故曰是名也。

※《金剛經破空論》云：「復次，凡愚不了諸法惟心，謂微塵積為世界，世界析為微塵。

不知微塵非微塵，云何可積為世界？世界非世界，云何可析為微塵？惟般若菩薩，了知微塵、世界無實性故，故云：即非微塵、世界。了知無性之性，即是微塵、世界之實性故，故云：是名微塵、世界。斯則空有雙明，遮照不二，所以福德超勝也。」

※《圓覺經》·普賢菩薩章云：「善男子！知幻即離，不作方便；離幻即覺，亦無漸次。

一切菩薩及末世眾生，依此修行，如是乃能永離諸幻。」